

四庫全書

子部

欽定四庫全書

太平御覽卷一百三十四

宋 李昉等 撰

偏霸部十八

陳陳蒨

陳頊

陳伯宗

陳叔寶

陳陳蒨

陳書曰世祖文皇帝諱蒨字子華始興昭烈王長子也

少沈敏有識量美容儀留意經史舉動方雅造次必遵禮法高祖甚愛之常稱此兒吾宗之英秀也梁太清初帝夢兩日鬪一大一小大者光滅墜地色正黃其大如斗世祖因三分取一而懷之侯景之亂鄉人多依山湖寇抄世祖獨保家無所犯時亂日甚乃避地臨安及高祖舉義兵侯景遣使收世祖及衡陽獻王世祖乃密袖小刀冀因入見而害景至便屬吏故其事不行高祖大軍圍石頭景欲加害者數矣會景敗世祖乃得出赴高

祖營起家為吳興太守高祖受禪立為臨川郡王邑二千戶拜侍中安東將軍及周文育侯安都敗於沌口高祖詔世祖入衛軍儲戎備皆以委焉尋命率兵城南皖永定三年六月庚午高祖崩遺詔徵世祖入纂皇統甲寅至自南皖入居中書省其日即皇帝位於太極前殿詔曰上天降禍奄集邦家大行皇帝背離萬國率土崩心若喪考妣龍圖寶歷眇屬朕躬運鍾擾攘事切機務南面須主西讓禮輕今便式膺景命光宅四海可大赦

天下改永定四年為天嘉元年鰥寡孤獨不能自存立者賜穀人五斛孝弟力田殊行異等加爵一級甲寅分遣使者宣勞四方辛酉輿駕親祀南郊二年春正月庚戌大赦天下十二月立始興國廟於京師用王者之禮太子中庶子虞荔御史中丞孔奐以國用不足奏立煮海鹽賦及權酤之科詔並施行三年春正月庚戌設帷宮於南郊幣告胡公以配天辛亥輿駕親祀南郊二月甲子改鑄五銖錢三月丙子安成王頊至自周詔授侍

中中書監中衛將軍置佐史是歲周所立梁王肅嘗死

子歸

立軌切

代立天康元年春二月庚子詔曰朕以寡德

纂承洪緒日昃勞思弘景業而政道多昧黎庶未康
兼疾患淹時亢陽累月百姓何咎實由朕躬念茲在茲
痛如疾首可大赦天下改天嘉七年為天康元年三月
己卯以驃騎將軍開府儀同三司揚州刺史司空安成
王頊為尚書令夏四月乙卯皇孫至澤生在位文武賜
絹帛各有差為父後者賜爵一級癸酉世祖疾甚是日

崩於有覺殿遺詔曰朕疾苦彌留遂至不救修短有命夫復何言但王業艱難頻歲軍旅生民多敝無忘愧惕今方隅未定俗教未弘便及大漸以為遺恨社稷任重太子可即君臨王侯將相善相輔翊內外協和勿違朕意山陵務存儉速大斂竟羣臣三日一臨公除之制率依舊典六月甲子羣臣上謚曰文皇帝廟號世祖葬永寧陵

陳伯宗

陳書曰廢帝諱伯宗字奉業小字藥王世祖嫡長子也
永定二年拜臨川王世子世祖嗣位立為皇太子天康
元年四月世祖崩即皇帝位二年春詔大赦天下改光
大元年孝悌力田賜爵一級輿駕祠南郊二年十一月
慈訓太后集羣臣於朝堂令降為臨海王送還藩邸是
日出居別第太建二年薨時年十九

陳頊

陳書曰高宗孝宣皇帝諱頊字紹世小字師利始興昭

烈王第二子也梁大通二年生有赤光滿室少寬大多智略及長美容儀身長八尺三寸手垂過膝有勇力善騎射高祖平侯景鎮京口梁元帝徵高祖子姪入侍高祖遣高宗赴江陵累官為直閣將軍中書侍郎時有馬軍主李總與高宗有舊每同遊處高宗嘗夜被酒張燈而寐總適出尋返乃見高宗身是大龍總便驚走時在關右永定元年遥襲封始興郡王邑二千戶三年世祖嗣位改封安成王天嘉三年自周還授侍中中書監中

衛將軍置佐史尋授使持節都督揚南徐東揚南豫北
江五州諸軍事揚州刺史進號驃騎將軍餘如故四年
加開府儀同三司六年遷司空天康元年授尚書令廢
帝即位拜司徒進號驃騎大將軍錄尚書都督中外諸
軍事給班劍三十人光大二年正月進位太傅領司徒
加殊禮劍履上殿增邑并前三千戶餘如故十一月甲
寅慈訓太后令廢帝為臨海王以高宗入纂是歲春正
月甲午即皇帝位於太極前殿詔改光大三年為太建

元年大赦天下在位文武賜位一階孝悌力田及為父
後者賜爵一級異等殊才並加策序鰥寡孤獨不能自
存者人賜穀五斛復太皇太后尊號曰皇太后立妃柳
氏為皇后世子叔寶為皇太子冬十月新除左衛將軍
歐陽紇據廣州舉兵反辛未遣車騎將軍開府儀同三
司章昭達率衆討之壬午輿駕親祠太廟二年春正月
乙酉以征西大將軍開府儀同三司郢州刺史黃法𣏲
其於為中護大將軍丙午輿駕親祠太廟二月癸未儀
切

同章昭達擒歐陽紇送都斬於建康市廣州平三月丙申皇太后崩丙午赦廣衡二州丁未大赦天下三年春正月癸丑以尚書右僕射領大著作徐陵為尚書僕射辛酉輿駕親祠南郊丁酉親耕藉田三月丁丑大赦天下自天康元年迄太建元年逋餘軍糧祿秩夏調未入者悉原之五年三月詔大都督吳明徹統衆十萬發自白下夏四月癸卯前巴州刺史魯廣達尅齊大岷城辛亥吳明徹尅秦州水柵庚申齊遣兵十萬援歷陽儀同

黃法氈破之辛酉齊軍救秦州吳明徹又破之癸亥詔
北伐衆軍所殺齊兵並令埋掩甲子南譙太守徐稷克
石梁城六年春正月壬戌朔詔曰王者以四海為家萬
姓為子一物乖方夕惕猶厲六合未混旰食彌憂朕嗣
纂洪基思弘經略上符景宿下叶人謀命將興師大拯
淪溺仄管未周凱捷相繼拓地數千連城將百蠢彼餘
黎毒茲異境江淮年少猶有剽掠鄉閭無賴摘出陰私
將帥軍人罔顧刑典今使苛法蠲除仁聲載路且肇元

告慶邊服來王始覩皇風宜覃恩澤可赦江右淮北南
北歷陽臨江等郡士民罪無輕重悉皆原宥七年春正
月辛未輿駕親祠南郊四月乙未陳桃根表上織成羅
文錦被裘各二百詔於雲龍門外焚之八月周遣使來
聘甘露頻降樂遊苑丁未輿駕幸樂遊苑採甘露宴羣
臣詔於苑龍舟山立甘露亭十一年春正月丁酉龍見
於南兖州永寧樓側池中二月癸亥輿駕親耕藉田三
月丁未詔淮北義人率戶口歸國者建其本屬舊名置

立郡縣即隸近州賦給田宅秋七月辛卯初用大貨六
銖錢八月甲子青州義主朱顯宗等率所領七百戶入
附丁卯輿駕幸大社觀閱武十一月詔建子令月微陽
初動應茲嘉辰宜播寬澤可大赦天下甲午周遣柱國
梁士彥率衆至肥口戊戌周軍進圍壽陽以新除中衛
大將軍揚州刺史始興王叔陵為大都督總督水步衆
軍十二月乙丑南北充晉三州及雍梁等九州並自拔
還京師譙北徐州又陷自是淮南之地盡沒於周矣十

四年春正月己酉高宗弗豫甲寅崩於宣福殿時年五十三上謚孝宣皇帝廟號高宗墓顯寧陵

陳叔寶

陳書曰後主諱叔寶字元秀小字黃奴高宗嫡長子也梁承聖二年生於江陵江陵陷高宗遷關右留後主於穰城天嘉三年歸京師立為安成王世子太建十四年正月高宗崩即皇帝位於太極前殿詔大赦尊皇后為皇太后宮曰弘範立妃沈氏為皇后七月辛未大赦是

月江水色赤如血自京師至於荊州九月設無碍大會於太極殿捨身及乘輿服御至德元年正月詔大赦改太建十五年為至德元年十二月夜天開自西北至東南其內有青黃雜色隱隱若雷聲後主在東宮好學有文藝及即位耽於酒色常在後庭不恤政事又於光昭殿前起臨春結綺望仙三閣閣高數丈並數十間其牕牖欄檻之類悉以沈檀香木為之飾以金玉間以珠翠微風暫至香聞數里瑰竒珍麗近古未有其下積石為

山引水為池植以奇樹雜以花藥後主自居臨春閣孔
貴人居望仙閣張貴妃居結綺閣並複道往來婦人麗
質巧態以從者常十餘人張貴妃孔貴人等八人侍坐
尚書令江總孔範等十人侍宴號曰狎客上令八婦人
製五言詩十客一時繼和遲則罰酒君臣酣飲從夕達
曙所司皆因閹人奏事主者由此擅作威福軍旅警備
並皆不修任用沈客卿施文慶等以苛刻為忠於是文
武離心莫肯用命隋文帝謂高頴曰我為百姓父母豈

可限一衣帶水不拯之乎命大作戰船人請密之隋文
曰吾將行天討何密之有使投梯於江彼若能改吾又
何求乃遣晉王廣為元帥以討之及聞隋軍臨江孔範
曰必無渡理但恣妓樂縱酒作詩不輟明日隋軍濟江
凡文武百寮皆潛出唯尚書僕射袁憲侍側憲勸端坐
殿上正色以待之後主曰鋒刃之下未可當之吾自有
計乃逃於井既軍人窺井呼之後主不應欲下石乃叫
以繩引之驚其太重及出與張貴妃孔貴人三人同束

而上賀若弼呼後主視之惶懼汗流股慄再拜弼謂之曰大國之卿當小國之君拜禮也入朝不失作歸命侯亦無勞恐懼三月後主與王公百司發自建鄴至長安後主已下大小在路五百餘里累累不絕隋文宣詔讓後主後主伏地不能對乃宥之給賜甚厚每侍宴恐致傷心為不奏吳音後監守者言叔寶願得官號隋文曰叔寶絕無心肝監守又言叔寶日飲一石少有醒時隋文曰不爾何以過日及從東巡狩邗山賦詩曰日月光

天德山河壯帝居太平無以報願上東封書並上表請
封禪隋文謙讓不許後從至仁壽宮嘗侍宴及出隋文
目之曰此敗豈不由作詩飲酒將此工夫何如思安邊
計策當賀若弼度京口彼人密啟告急叔寶為飲酒遂
不發高頊至猶見啟在牀下未開封豈能不亡也後主
以隋仁壽四年十一月終洛陽在位七年年五十二歲
史臣曰後主生深宮之中長婦人之手既屬邦國殄瘁
不知稼穡艱難初懼阽危屢有哀矜之詔後稍安集復

扇淫侈之風賓禮諸公惟寄情於文酒昵近羣小皆委
之以衡軸謨謀所及遂無骨鯁之臣權要所在莫非侵
漁之吏刑政日紊尸素盈朝耽荒為長夜之飲嬖寵同
豔妻之孽危亡弗恤上下相蒙衆叛親離臨機不悟自
投於井冀以苟生視其以此求全抑亦民斯下矣遐觀
列辟纂武嗣興其始也皆欲齊明日月合德天地高視
五帝俯協三王然而靡不有初鮮克有終其故何哉並
以中庸之材懷可移之性口存於仁義心怵於嗜慾仁

義利物而道遠嗜慾遂性而便身便身不可久違道遠
難以固志佞諂之倫承顏候色因其所好以悅導之若
下坂走丸順流決壅非天感靈辰象降生明德孰能遺
其所樂而以百姓為心哉此所以成康文景千載而罕
遇也

太平御覽卷一百三十四

欽定四庫全書

太平御覽卷一百三十五

宋 李昉等 撰

皇親部一

總序后妃

人皇后

庖犧母

神農母

黃帝母

黃帝四妃

顓頊母

顓頊妃

帝嚳四妃

堯妃

舜母

舜二妃

夏禹母

禹妃

帝相后

桀妃

殷湯母

湯妃

帝乙妃

紂妃

周太王妃

王季妃

文王妃

武王妃

宣王后

幽王褒后

秦始皇太后

總序后妃

尚書大傳曰古者后夫人將侍君前息燭後舉燭至於

房中釋朝服襲燕服然後入御史奏雞鳴於階下

奏猶白階

也然後夫人鳴佩玉於房中告去也然後應門擊柝告

闕也應門朝門也闕啓也然後少師奏質明於階下質正然後夫人

入庭立君出朝

毛詩曰閔睢后妃之德也風之始也所以風天下而正夫婦也閔閔睢鳩在河之洲窈窕淑女君子好逑

又曰葛覃后妃之本也后妃在父母家則志在於女功之事恭儉節用服澣濯之衣尊師敬傅則可以歸寧父母化天下以成婦道也

又曰卷耳后妃之志也又當輔佐君子求賢審官知臣下之勤勞內有進賢之志而無險詖私謁之心朝夕思念至於憂勤也采采卷耳不盈頃筐嗟我懷人寘彼周

行

又曰樛木后妃逮下也言能逮下而無嫉妬之心焉南
有樛木葛藟累之樂只君子福履綏之

又曰螽斯后妃子孫衆多也言若螽斯不妬忌則子孫
衆多也螽斯羽詵詵兮宜爾子孫振振兮

又曰桃天后妃之所致也不妬忌則男女以正婚姻以
時國無鰥民也桃之夭夭灼灼其華之子于歸宜其室
家

又曰鬼置后妃之化行也閨雎之化行則莫不好德賢人衆多也肅肅鬼置極之丁丁赴赴武夫公侯干城

又曰采芣后妃之美也天下和平則婦人樂有子矣采采芣芣薄言采之

又曰雞鳴思賢妃也哀公荒淫怠慢故陳賢妃貞女夙夜警戒相成之道焉

周禮曰天子之妃曰后

鄭玄注曰后之言後也

又昏義曰古者天子后立六宮三夫人九嬪二十七世

婦八十一御妻以聽天下之內治以明章天下之婦順
故內和而家理天子立六官三公九卿二十七大夫八
十一元士以聽天下之外治以明章天下之男教故外
和而國治故曰天子聽男教后聽女順天子理陽道后
治陰德天子聽外治后聽內職教順成俗外內和順國
家治理此之謂盛德

白虎通曰天子之妃謂之后何后者君也天子妃至尊
故謂君也明海內之小君也

漢書曰自古受命帝王及繼體守文之君非獨內德茂也蓋亦有外戚之助焉夏之興也以塗山而桀之放也用妹喜殷之興也以有娥及有嬖而紂之殺也嬖妲己周之興也以姜嫄及太任太姒而幽王之禽也淫於褒姒故易基乾坤詩首關雎書美釐降春秋譏不親迎夫婦之際人道之大倫也

漢書曰漢興因秦之稱號帝母稱皇太后祖母稱太皇太后適稱皇后妾皆稱夫人又有美人良人八子七

子長使少使之號焉至武帝制婕妤嬪娥俗華充依各有爵位而元帝加昭儀之號凡十四等云昭儀位視丞相爵比諸侯王婕妤視上卿比列侯嬪娥視中二千石比關內侯俗華視真二千石比大上造美人視二千石比少上造八子視千石比中更充依視千石比左更七子視八百石比右庶長良人視八百石比左庶長長使視六百石比五大夫少使視四百石比公乘五官視三百石順常視二百石無涓共和娛靈保林良使夜者皆

視百石上家人子中家人子視有秩斗食云五官以下

葬司馬門外

陵上司馬門外

應邵漢官儀曰皇后稱椒房詩云椒聊之實蕃衍盈升美其繁盛以椒塗室亦取溫暖除惡氣也猶天子赤泥殿上曰丹墀

漢舊儀曰皇后婕妤乘輦餘皆以茵四人輿以行

又曰皇后玉璽文與帝同皇后之璽金螭虎紐

又曰皇后太子各食三十縣曰湯沐邑

五經要義曰古者后夫人必有女史彤管之法后妃羣
妾以禮御於君所女史書其日授之環以示進退之法
生子月辰則以金環退之當御者以銀環進之著於左
手既御著於右手左者陽也以當就男故著左手右
手陰也既御而復故此女史之職也

後漢書曰夏殷以上后妃之制其文略矣周禮王者立
后三夫人九嬪二十七世婦八十一御妻以備內職焉
后正位宮闈同體天王夫人坐論婦禮九嬪掌教四德

世婦主喪祭賓客御妻序於王之燕寢頒官分務各有
典司女史彤管記功書過居有保阿之訓動有環珮之
響進賢才以輔佐君子哀窈窕而不淫其色所以能述
宣陰化修成內則閨房肅雍險謁不行也故康王晚朝
闕睢作諷宣王晏起姜氏請愆及周室東遷禮序凋缺
諸侯僭縱軌制無章齊桓有如夫人者六人晉獻升戎
女為元妃終於五子作亂冢嗣構屯爰逮戰國風憲偷
薄適情任欲顛倒衣裳以至破國亡身不可勝數斯固

輕禮弛防先色後德者也秦并天下多自驕大官備七
國爵列八品漢興因循其號而婦制莫釐高祖惟薄不
修孝文社席無辨然而選納尚簡飾玩少華自武元之
後世增淫嬖至乃掖庭三千增級十四妖幸毀政之符
外姻亂邦之迹前史載之詳矣及光武明德中興斷雕
為樸定六宮稱號唯皇后貴人金印紫綬俸不過粟數
十斛又置美人宮人采女三等並無爵秩歲時賞賜充
給而已漢法常因八月遣中大夫與掖庭丞及相工於

洛陽鄉中閱視良家童女年十三以上二十以下姿色
端麗合法相者載還後宮擇視可否乃用登御所以明
慎聘納詳求淑哲明帝聿遵先旨宮教頗修登建嬪后
必先令德內無出閫之言權無私溺之授可謂矯其弊
矣向使因設外戚之禁編著甲令改正后妃之制貽厥
方來豈不休哉雖御已有度而防閑未篤故孝章以下
漸用色授恩隆好合遂忘滋蠹自古雖主幼時艱王家
多釁必委成家宰簡求忠賢未有專任婦人割斷重器

唯秦羊太后始攝政事故穰侯權重於昭王家富於嬴
國漢仍其謬知患莫改東京皇統屢絕權歸女主外立
者四帝臨朝者六后莫不定策帷帟委事父兄貪孩童
以久其政抑明賢以專其威任重道悠利深禍速身犯
霧露於雲臺之上家嬰縲紲於囹圄之下湮滅連踵傾
軛繼路而赴蹈不息焦爛為期終於陵夷大運淪亡神
寶詩書所歎略同一揆

魏志曰魏因漢法母后之號皆如舊制自夫人以下世

有增損太祖建國始命王后其下五等有夫人有昭儀有婕妤有華俗有美人文帝增貴嬪淑媛修容順成良人明帝增淑妃昭華修儀除順成官太和中始復命夫人登其位於淑妃之上自夫人以下爵凡十二等

又曰黃初三年詔曰婦人與政亂之本也自今以後羣臣不得奏事太后后族之家不得當輔佐之任又不得橫授茅土之爵以此詔傳後世若有背違天下共誅之殷融議后父不應拜后曰天性之親父子之道人倫之

序君臣之義性因至親故情禮無二序緣分立故尊嚴
無上易曰有父子然後有君臣有君臣然後有禮義生
焉故資父事君教之至也君不以貴而臣其所尊故子
爵不加於父也夫以帝王之尊猶無臣妾父母之義况
后從尊於帝而今父母執臣妾耶鄭玄復云公朝與歸
寧別有二制尊卑迭用拜謁更序亦有未詳斯議為何
所據

晉張華女史箴曰茫茫造化兩儀始分散氣流行既陶

既甄在帝庖犧肇經天人爰始夫婦以及君臣家道以
正王猷有倫婦德尚柔含章貞吉嫺婉淑慎正位居室
施衿結褵虔恭中饋肅慎爾儀式瞻清懿樊姬感莊不
食鮮禽衛女矯桓耳忘和音志厲義高二主易心玄熊
攀檻馮媛趨進夫豈無畏知死不怵班姬有詞割歡同
輦夫豈不懷防微慮遠道罔隆而不殺物無盛而不衰
日中則昃月滿則虧崇猶塵積替若駭機人咸知其飾
容而莫知其飾性性之不飾或愆於正禮容知藻克念

作聖出其言善千里應之苟違斯義同衾以疑夫出言
如微而榮辱由茲勿謂幽昧靈鑒無象勿謂玄漠神聽
無響無矜爾榮天道惡盈無恃爾貴隆隆者墜鑿於小
星戒彼攸遂比心螽斯則繁爾類歡不可以極寵不可
以專專實生慢愛極則遷致盈必損理有固然美者自
美翻以取尤冶容求好君子所仇結恩而絕職此之由
故曰翼翼矜矜福所以興靖恭自思榮顯所基女史司
箴敢告庶姬

後魏書曰魏氏王業之兆雖始於神元至於昭成世崇
儉質妃嬙嬪御率多闕焉唯以次第為稱而章平思昭
穆惠煬烈八帝妃后無聞道武追尊祖妣皆從帝諡為
皇后妃立中宮餘妾或稱夫人多少無限然皆品次太
武始增左右昭儀及貴人椒房等後庭漸已多矣

後魏書曰後魏故事將立皇后必令手鑄金人以成者
為吉不成則不得立也又太武文成保母劬勞之恩並
極尊崇之義雖事乖典禮而觀過知仁

北史曰周氏率由姬制內職有序文帝創基修衽席以
儉約武皇嗣立節情愆於矯枉宮闈有貫魚之美戚里
無私溺之尤可謂得人君之體也宣王外行其志內逞
其欲溪壑難滿採擇無厭恩之所加莫限廝皂祭之所
及無隔險設於是升蘭殿以正位踐椒庭而齊體者非
一人焉階房帷而施青紫緣恩倖而擁玉帛者非一族
焉雖辛癸之荒淫趙李之傾城曾未足比其髣髴也人
厭苛政弊事實多文帝之祀忽諸宣王特由於此隋文

思革前弊太矯其過惟皇后當室旁無私寵婦官位號未詳備焉開皇二年著內官之式略依周禮省減其數煬帝時后妃嬪御無釐婦職惟端容麗飾陪從宴遊而已帝又參詳典故自製嘉名著之於令

人皇后

春秋命歷序洛書適亡辟曰人皇兄弟九人別長九州

離艮地精女出為之后

離艮卦所推也

庖犧母

河圖曰燧人之世大跡出雷澤華胥履之生伏羲帝系
譜曰伏羲十月四日人定生

孝經河圖云伏羲
在亥得人定之時

神農母

春秋元命苞曰女登生神農人面龍顏始為天子

孝經鈞命決曰任姒感龍生帝嵬魁

嵬魁神
農名

帝王世紀曰炎帝神農母曰任姒有奶氏女名女登少
典妃遊華陽有龍首感之生神農於蒙羊山娶莽水氏
之女曰聽託

音伏生帝臨魁

黃帝母

河圖曰黃帝母曰地祇之子名附寶之郊野大電繞北斗樞星耀感附寶生軒轅

帝王世紀曰黃帝有熊氏少典之子母曰附寶其先即炎帝母家有喬氏之女世與少典氏婚及神農之末少典氏又娶附寶見大電光繞北斗樞星照郊野附寶孕二十五月生黃帝於壽丘

黃帝四妃

史記曰黃帝娶於西陵之女是為嫫祖嫫祖為黃帝正妃生二子其後皆有天下

漢書古今表曰黃帝妃方雷氏生玄囂為青陽妃嫫祖生昌意妃彤魚氏生夷鼓妃嫫母生蒼林

帝王世紀曰黃帝四妃生二十五子元妃西陵氏嫫祖次妃方雷氏曰女節次曰彤魚氏次曰嫫母

列女傳曰黃帝妃曰嫫母於四妃之班居下貌甚醜而最賢心每自退

顓頊母

河圖曰瑤光之星如虹貫月正白感女樞於幽房之宮
生帝顓頊

史記曰昌意娶蜀山女昌僕生高陽高陽有聖德黃帝
崩高陽立是為顓頊

帝王世紀曰昌意之妃謂之女樞金天氏生顓頊於弱
水

顓頊妃

世本曰顓頊娶於勝墳氏

宋忠注曰國名

之子謂女祿是生老

童

帝系云勝奔氏餘同

帝嚳四妃

河圖曰慶都與赤龍合生帝堯於伊祁

世紀云從母姓

毛詩曰天命玄鳥降而生商宅殷土芒芒

春秋元命苞曰周本姜嫄遊閼宮其地扶桑履大跡生
后稷

春秋合誠圖曰堯母慶都有名於世蓋太常之女生於

斗維之野常在三阿之東南天大雷電有血流潤大石之中生慶都長大常有黃雲覆蓋之夢食不饑

天帝以氣食

年二十寄伊長孺家無夫出觀三阿之首常若有神隨之有赤龍負圖至署曰赤帝起成天寶即慶都之謹任之乳之必於翼之野奄然陰風雨龍與慶都合有娠龍消不見

漢書云堯母十四月生堯帝王世紀搜神記同

史記曰嚳娶陳鋒氏女生放勳

又曰后稷棄母有邠氏女曰姜嫄為帝嚳元妃出野見

巨人跡心欣然踐之身動如孕者居期而生子以為不祥棄之隘巷以為神收養之初欲棄之因名棄

毛詩生民曰厥初生民時維姜嫄

生民本后稷也姜姓出后稷之母配高辛

氏帝馬者也

史記曰殷契母曰簡狄有娥氏為帝嚳次妃見玄鳥遺卵簡狄取而吞之因孕生契

世本曰帝嚳卜其四妃之子而皆有天下元妃有邠國之女曰姜嫄是產后稷次妃有娥氏之女簡狄是產契

次妃曰陳妃是生帝堯次妃曰嫫姆產帝執

帝王世紀曰嫫姆班在四人下生摯最長故登帝位

堯妃

世本曰堯娶散宜氏子謂之女皇

宋忠曰是生丹
朱帝系漢書同

帝王世紀曰女瑩生丹朱

漢書亦
云女瑩

舜母

河圖著命苞曰女登見大虹意感生舜於姚墟

史記曰舜父瞽叟盲而舜母死瞽叟更娶妻而生象

舜二妃

尚書曰師錫帝曰有鰥在下曰虞舜帝曰兪予聞如何
岳曰瞽子父頑母嚚象傲克諧以孝烝烝乂不格姦帝
曰我其試哉女于時觀厥刑于二女釐降二女于漚汭
嬪于虞帝曰欽哉

禮記曰舜葬蒼梧蓋二妃未之從也

山海經曰大荒之中有不庭之山帝舜妻娥皇生焉
帝系曰舜娶於帝堯謂之曰女姬

列女傳曰有虞二妃帝堯之二女也長曰娥皇次曰女英堯舉舜為相攝行王政舜每事常謀於二女舜既受禪為天子娥皇為后女英為妃事瞽瞍猶若初焉天子稱二妃聰明貞仁舜陟方死蒼梧二妃死於江湘之間故謂之湘君

尸子曰堯妻舜以娥皇媵之以女英

離騷九歌湘夫人曰帝子降兮北渚目眇眇兮愁予帝子

謂堯二女娥皇女英隨舜不及卒於湘水因名曰湘夫人也嫋嫋兮秋風洞庭之波

兮木葉下

夏禹母

河圖著命苞曰修己見流星意感生帝文命禹

周禮含文嘉曰夏姒氏祖以薏苡生

孝經鈞命決曰流星貫昴紀夢接生禹

世本曰絲娶有莘氏女志是生高密禹

禹妃

尚書咎繇謨禹曰予娶于塗山辛壬癸甲

辛日娶妻至
于甲子復往

治水啟呱呱而泣子弗子

塗山女
史記同

山海經曰太室嵩高咸陽西啟母化為石焉

帝王世紀曰禹始納塗山女曰女媧合婚於台桑有白
狐九尾之瑞至是為攸女故連山易曰禹娶塗山之子
名曰攸女生啟是也

列女傳曰啟母塗山者夏禹之妃塗山氏女也禹娶四
日而去治水啟既生呱呱而泣禹三過其門不入

呂氏春秋曰禹行水見塗山之女禹未之遇南音南土

遇以禮成之

塗山之女乃令其妾往候禹於塗山之陽女作

歌曰候人實始作南音也

帝相后

左傳曰伍負曰昔有過澆滅夏后相后緡方娠逃出自

竇

后緡相妻

歸於有仍

緡有仍氏女

生少康焉澆求之逃奔有虞

虞思妻之以二姚

楚辭曰迨少康之未家留有虞之二姚

桀妃

洛書錄運法曰孔甲見逢氏抱小女妹喜帝孔甲悅之
以為太子履癸妃

國語曰桀伐蒙山而得妹喜

紀年曰后桀伐蒙山山民進女於桀二人曰琬曰琰桀
受二女無子刻其名於苕華之上苕是琬華是琰而棄
其元妃於洛曰妹喜

帝王世紀曰妹喜好聞裂繒之聲而笑桀為發繒裂之
以順適其意

列女傳曰夏桀妹喜者桀之妃也桀伐有施有施女以

妹喜

以女妻人曰女

殷湯母

河圖著命苞曰扶都見白氣貫月意感生黑帝子湯

湯妃

帝王世紀曰湯娶有莘為正妃

列女傳曰湯妃有莘之女也擇德高如伊尹者為之臣
佐湯致王訓正後宮嬪御有序咸無嫉妬逆理之人生

三子太丁外丙仲壬教誨有成太丁早卒丙壬嗣登大位

帝乙妃

史記曰帝乙長子曰微子啓賤不得立立少子辛辛母正后位

帝王世紀曰帝乙二妃生四子長曰微子啓中微仲少曰辛庶妃生箕子初啓母之生啓及仲尚為妾及立為后乃生紂

紂妃

史記曰紂伐有蘇有蘇人以妲己女焉紂愛妲己惟妲己之言是從武王殺之斬以玄戈懸之小白旗

列女傳曰妲己者殷紂之妃也紂伐有蘇有蘇女以妲己美而辯用心邪僻巧比於體臧施於貌紂好酒淫樂不離妲己所譽者貴之所憎者誅之

周太王妃

毛詩曰古公亶父來朝走馬率西水滸至于岐下爰及

姜女聿來胥宇

又曰摯仲氏任自彼殷商來嫁于周曰嬪于京乃及王

季維德之行

摯國
任姓

史記曰古公太姜生少子季歷季歷娶太任皆賢婦人
生子曰昌

列女傳曰太姜者太王之妃有台之女賢而有色生太
伯仲雍王季化導三子皆成賢德太王有事必諮謀焉

王季妃

河圖著命苞曰太任夢長人感已生文王

毛詩曰思齊太任文王之母思媚周姜京室之婦

列女傳曰太任者王季之妃摯任之女也端懿誠莊維德之行及其有娠也目不視惡色耳不聽淫聲口不出放言洩於豕牢而生文王文王生而明聖太任教以一周知其百卒為周宗君子謂太任能為胎教

文王妃

毛詩曰天監在下有命既集文王初載天作之合在洽

之陽在渭之溪，纘女維莘，長子維行。

纘，繼也。莘，太姒國也。長子，長女也。

篤生武王。

箋云：太姒厚生聖子武王。

又曰：太姒嗣徽音，則百斯男。

論語曰：武王曰：予有亂臣十人。

馬融曰：亂，理也。十人，謂周公旦、召公奭、太公望。

畢公榮公、太顛、閔天、散宜生、南宮括，共一人，謂文母也。

孔子曰：才難不其然乎？唐

虞之際，於斯為盛，有婦人焉，九人而已。

列女傳曰：太姒者，文王之妃，莘，似之女也，號曰文母。

武王妃

左傳曰子產曰當武王邑姜方娠太叔

杜預注曰邑姜武王后齊太公

之女也懷胎為娠太叔成王之弟叔虞

夢帝謂己余命而子曰虞

帝天帝也虞唐

君之名

將與之唐屬諸參而蕃育其子孫及生有文在手

曰虞遂以命之

帝王世紀曰武王納太公之女曰邑姜修教於內生太叔

宣王后

璣語曰元妃獻后生子不完期月而生后弗敢舉王名

羣吏問將棄之仲山甫曰天將以是棄周棄之何益且卜筮吉何必從乃弗棄

列女傳曰周宣姜后者齊侯之女也宣王嘗早卧而晏起后夫人不出於房姜后脫簪珥待罪於永巷使其傅母通言於王曰妾之不才妾之淫心見矣至使君王失禮而晏朝以見君王之樂色而忘德也王曰寡人不德實自生過非夫人之罪也

幽王褒后

毛詩曰白華周人刺幽后也幽王娶申女以為后又得褒姒而黜申后故下國化之以妾為妻以孽為宗

又曰正月刺幽王也燎之方揚寧或滅之赫赫宗周褒姒滅之

國語曰夏之衰也二龍止於夏庭曰余褒之二君夏后卜殺之留之莫吉卜請其瘞而藏之吉

韋昭曰龍吐沫龍之精氣也

龍亡而瘞在櫝而藏之三代莫發厲王之末發而觀之瘞流於庭不可除王使婦人裸而譟之瘞化為玄龜入

皇后宮童妾既黷而遭之既筭而孕無夫而生子王懼而棄之宣王之時童謠曰歷弧箕服實亡周國有夫婦賣是器者王使執而戮之逃於道而見後宮童妾所棄妖子聞其啼哀而收之夫婦亡奔褒褒人有罪請入所棄女是為褒姒幽王愛之生伯服廢申后而以褒姒為后褒姒不好笑幽王欲其笑萬方不笑幽王為烽火有寇至則舉烽火諸侯悉至至而無寇褒姒大笑幽王悅之數為舉烽火其後不信諸侯不至西夷犬戎攻殺幽

王虜褒

似史記列女傳
世紀並同也

列女傳曰幽王出入與褒似同乘弋獵不時以適褒似


意

秦始皇太后

史記曰呂不韋所幸邯鄲美姬有娠而進之於太子楚
生秦始皇是為太后

說苑曰秦始皇太后不謹幸郎嫪毐封為長信侯為生
兩子毒專國事浸益驕奢與侍中左右貴臣棋博飲酒

爭言而鬪瞋目大呼曰吾乃皇帝之假父也寧人子何
敢與我抗所與鬪者走白始皇始皇大怒毒因作亂戰
咸陽宮始皇取毒四支車裂之取其兩弟囊撲殺之取
皇太后遷之資陽宮下令曰敢以太后事諫者戮而殺
之闕下諫而死者二十七人茅焦乃上謁諫始皇遂以
千乘萬騎自迎太后歸咸陽太后喜大置酒待茅焦及
飲太后曰抗枉令直使敗更成安秦社稷使妾母子復
得相會茅君之力也



太平御覽卷一百三十五

欽定四庫全書

子部

太平御覽卷一百三十八

六五

詳校官侍讀學士_臣沈咸熙

員外郎_臣牛稔文覆勘

總校官降誦編修_臣倉聖脈

校對官助教_臣胡于棗

謄錄監生_臣吳之承

欽定四庫全書

太平御覽卷一百三十六

皇親部

漢太上昭靈后

高祖薄皇后

孝文竇皇后

孝景王皇后

宋 李昉等 撰

高祖呂皇后

孝惠張皇后

孝景薄皇后

孝武陳皇后

孝武衛皇后

孝武李夫人

孝昭趙皇后

孝昭上官皇后

衛太子史戾后

史皇孫王悼后

孝宣許皇后

孝宣霍皇后

孝宣王皇后

孝元王皇后

孝元傅皇后

信都馮太后

孝成許皇后

孝成趙皇后

孝哀丁太后

孝哀傅皇后

孝平母衛姬

孝平王皇后

漢太上昭靈后

詩含神霧曰含始吞赤珠刻曰玉英生皇

刻刻錢有玉英文也後

赤龍感女媧劉季興

春秋握成圖曰執嘉妻含始游維池赤珠出刻曰玉英

吞此為王客以其年生劉季為漢皇

為王客者為王者所賓客

史記曰高祖母媧嘗息大澤之陂夢與神遇時雷電晦冥父太公往視則見蛟龍於上已而有娠遂產高祖

帝王世紀曰太上皇名執嘉妃曰女媪是為昭靈后

陳留風俗傳曰沛公起兵野戰喪皇妣於黃鄉天下平

定乃使使者以梓宮招魂於幽野於是有丹蛇在水自

洒濯入於梓宮其浴處有遺髮故謚曰昭靈后

黃鄉今小黃縣

也

高祖呂皇后

漢書曰高祖后呂皇后父呂公單父人也好相人高祖
微時呂公見而異之乃以女妻高祖生惠帝魯元公主

後高祖得定陶戚夫人愛幸生趙王如意呂后為人剛毅佐高祖定天下高祖崩惠帝立呂后為皇太后乃令永巷囚戚夫人髡鉗衣赭衣令舂戚夫人舂且歌曰子為王母為虜終日舂薄暮常與死為伍相離三千里當誰使告汝太后聞之大怒曰乃欲倚汝子耶乃召趙王誅之使者三反趙相周昌不遣太后召趙相相徵長安使人復召趙王王來惠帝慈仁知太后怒自迎趙王霸上入宮挾與起居飲食數月帝晨出射趙王不能

早起太后伺其獨居使人持鴆飲之遲帝還趙王死太后
遂斷戚夫人手足去眼熏耳飲瘖藥使居鞠域中名曰
人彘居數月召惠帝視人彘帝視而問知其戚夫人乃
大哭因病歲餘不能起使人請太后曰此非人所為臣
為太后子終不能復治天下以此日飲為淫樂不聽政
七年而崩立孝惠後宮子為帝太后臨朝稱制后持天
下八年病犬禍而崩

高祖薄皇后

漢書曰高祖薄姬文帝母也父吳人秦時與故魏王宗女魏媼通生薄姬魏豹立為王而魏媼內其女於魏宮許負相薄姬當生天子曹參等虜魏王薄姬輸織室詔內後宮歲餘不得幸始姬少時與管夫人趙子兒相愛約曰先貴無相忘已而管趙先幸漢王四年坐河南成臯靈臺此兩美人侍相與笑薄姬初時約漢王問其故兩人俱以實告漢王心悽然憐薄姬是日召欲幸之對曰昨暮夢龍據妾胸上曰是貴徵也吾為汝成之遂幸

有身歲中生文帝高帝幸姬戚夫人之屬呂后怒皆幽之不得出宮而薄姬以希見故得出從子之代代王為帝尊為皇太后

東觀漢記曰中元元年告祠高廟曰高皇后不宜配食薄太后慈仁孝文皇帝賢明子孫賴福延至於今宜配食地祇高廟今上薄太后尊號為高皇后遷呂后於園

孝惠張皇后

漢書曰孝惠張皇后宣平侯敖女也侯尚帝姊魯元公主有女惠帝即位呂太后欲為重親以公主女配帝為皇后欲其生子萬方終無子乃使陽為有身取後宮美人子名之殺其母立所名子為太子惠帝崩太子立為帝呂后崩大臣正之以非孝惠子誅之孝惠后廢處北宮

孝文竇皇后

漢書曰孝文竇皇后景帝母也呂太后時以良家子選

入宮會太后出宮人以賜諸王各五人竇姬與在行中
家在清河乃求其主者願歸趙近清河而主者誤寘於
代籍中竇姬泣涕而行及至代代王獨幸竇姬生景帝文
帝立數月公卿請立太子而竇姬為皇后景帝立為皇
太后好黃帝老子言景帝及諸竇不得不讀老子尊
其術

孝景薄皇后

漢書曰孝景薄皇后孝文薄太后家女也景帝立立薄

妃為皇后無子無寵立六年薄太后崩皇后廢

孝景王皇后

漢書曰孝景王皇后武帝母也父仲槐里人初嫁為金王孫婦生一女美而母臧兒卜筮曰兩女當貴欲倚兩女奪金氏金氏怒不肯與決乃內太子宮太子幸愛之生三女一男男方在身夢日入其懷中以告太子太子曰此貴徵也景帝即位立為皇后男為太子景帝崩武帝即位為皇太后也

孝武陳皇后

漢書曰孝武陳皇后長公主嫖女也武帝立為太子長公主有力取主女為妃及帝即位妃立為皇后擅寵驕貴十餘年而無子聞衛子夫得幸幾死者數焉上愈怒后又挾婦人媚道頗覺元光五年上遂窮治之女子楚服等坐為皇后巫蠱祠祭祝詛大逆無道相連及誅者三百餘人楚服梟首於市賜后策曰后感於巫祝不可以承天命其上璽綬罷退居長門宮

司馬相如長門賦序曰孝武皇帝陳皇后得幸時頗妬別在長門宮愁悶悲思聞蜀郡成都司馬相如天下工為文奉黃金百斤為相如文君取酒因於解悲愁之辭而相如為文以悟主上陳皇后復得親幸

孝武衛皇后

漢書曰孝武衛皇后字子夫生微賤為平陽主謳者武帝即位數年無子平陽主求良家女子十餘人飾置家帝被霸上

被除也於霸水上自被除今三月上巳被袂也

還過平陽主主見所

侍美人帝不悅既飲謳者進帝獨悅子夫帝起更衣子夫侍尚衣軒中得幸還坐驪甚賜平陽王金千斤因奏子夫送入宮子夫上車主拊其背曰行矣強飯勉之即貴願無相忘入宮歲餘不復幸武帝擇宮人不中用者斥出之子夫得見涕泣請出上憐之復幸遂有身專寵元朔元年生男據遂立為皇后

據即庾太子也

孝武李夫人

漢書曰孝武李夫人本以倡進初夫人兄延年性知音

善歌舞武帝愛之每為新聲變曲聞者莫不感動延年
侍上起舞歌曰北方有佳人絕世而獨立一顧傾人城
再顧傾人國寧不知傾城與傾國佳人難再得上歎息
曰善世豈有此人乎平陽主因言延年有女弟上乃召
見之實妙麗善舞由是得幸生一男是為昌邑哀王李
夫人少而早卒上憐憫焉圖畫其形於甘泉宮及衛思
后廢後四年武帝崩大將軍霍光緣上雅意以李夫人
配食追上尊號曰孝武皇后初李夫人病篤上自臨候

之夫人蒙被謝曰妾久寢病形貌毀壞不可以見帝願以王及兄弟為託上曰夫人病甚殆將不起一見我屬託王及兄弟豈不快哉夫人曰婦人貌不修飾不見君父妾不敢以燕嬖見帝上曰夫人弟一見我將加賜千金而予兄弟尊官夫人曰尊官在帝不在一見上復言欲必見之夫人遂轉向欵歔而不復言於是上不悅而起夫人姊妹讓之曰貴人獨不可一見上屬託兄弟耶何為恨上如此夫人曰所以不欲見帝者乃欲以深託兄弟也

我以容貌之好得從微賤愛幸於上夫以色事人者色衰則愛弛愛弛則恩絕上所以孿孿顧念我者乃以平生容貌也今見我毀壞顏色非故必畏惡吐棄我意尚復肯追思憫錄其兄弟哉及夫人卒上以后禮葬焉

孝昭趙皇后

史記曰鈞弋夫人姓趙氏河間人也得幸武帝生子一人昭帝是也武帝年七十乃生昭帝昭帝立時年五歲

衛太子廢上居甘泉宮召畫工圖周公負成王於是左
右羣臣知武帝意欲立少子也後數日帝譴責鈞弋夫人
夫人脫簪珥叩頭帝曰引持去送掖庭獄夫人還顧帝曰
趣行女不得活夫人死雲陽宮時暴風揚塵百姓感傷
使者夜持棺往葬之封識其處其後帝閒居問左右曰
人言云何左右對曰人言且立其子何為去其母
乎帝曰然是非兒曹愚人所知也往古國家所以亂也
由主少母壯女主獨居驕蹇淫亂自恣莫能禁也汝不

聞呂后耶故諸為武帝生子者無男女其母莫不謹死
豈可謂非賢聖哉

漢書曰孝武鈞弋趙婕妤家在河間武帝巡狩過河間
望氣者言此有竒女天子亟使使召之既至兩手皆
拳上自披之手即時伸由是得幸號曰拳夫人進為婕
妤居鈞弋宮大有寵元始三年生昭帝號鈞弋子妊身
十四月乃生上曰聞昔堯十四月而生今鈞弋亦然乃
命其所生門曰堯母門昭帝即位追尊為皇太后

漢武故事曰拳夫人進為婕妤居鈎弋宮解黃帝素女之術從上至甘泉因幸告上曰妾相運正應為陛下生一男男七歲妾當死今年必死宮中多蠱氣必傷聖體言終而卧遂卒既殯香聞十餘里因葬雲陵上哀悼又疑非常人發冢空棺無尸唯衣履存焉起通靈臺於甘泉常有一青鳥集臺上往來至宣帝時乃止

列仙傳曰鈎弋夫人姓趙氏好學沈靜病卧六年右手拳飲食少望氣者云東方有貴人氣推而得之召到姿色甚

偉帝披其手得一鉤而手尋展既生昭帝武帝害之殞尸不冷而香數月昭帝即位更葬之棺空但有衣履故名其宮曰鈎翼後避諱改為弋

孝昭上官皇后

漢書曰孝昭上官皇后隴西上邽人祖父桀因材力親近為侍中昭帝始立年八歲帝姊鄂邑長公主居禁中共養帝時上官安有女因丁外人聞之長公主召入為婕妤好月餘為皇后年甫六歲安以后父封侯桀謀反發覺

后以少不預謀亦以霍光外孫不廢宣帝即位為太皇太后建昭二年崩合葬平陵

衛太子史戾后

漢書曰衛太子史良娣宣帝祖母也太子有妃有良娣有孺子妻妾凡三等子皆稱皇孫史良娣生男進號史皇孫武帝末巫蠱事起衛太子及良娣史皇孫皆遭害

史皇孫王悼后

漢書曰史皇孫王夫人宣帝母也名翁須太始中得幸

於史皇孫皇孫妻妾無號位皆稱家人子政和二年生
宣帝帝生數月衛太子皇孫敗家人子皆坐誅莫有收
葬者唯宣帝得全即尊位後追尊母夫人謚曰悼后祖
母史良娣曰戾后皆改葬

孝宣許皇后

漢書曰孝宣許皇后元帝母也父廣漢昌邑人為暴室
嗇夫廣漢有女平君十四五當為內者令歐侯氏子婦
臨當入歐侯子死其母將行卜相言當大貴母獨喜

張賀聞許嗇夫有女乃置酒請之酒酣為言曾孫可妻也廣漢許諾明日媼聞之怒廣漢重令為介遂與曾孫及立為帝平君為婕妤是時霍將軍有小女與皇太后有親公卿議更立皇后皆心儀霍將軍女亦未有言上乃詔求微時故劍大臣知指白立許婕妤為皇后明年許皇后當娠病女醫淳于衍受霍氏指取附子以飲皇后遂崩謚曰恭哀皇后

孝宣霍皇后

漢書曰孝宣霍皇后光女也母顯既使女醫陰殺許后

顯因為女成君衣補治入宮具

師古曰謂縫作嫁時衣被也

勸光內

之立為皇后初許后起微賤登至尊從官車服甚節儉五日一朝皇太后於長樂宮親奉案上食以婦道供養及霍后立亦循許后故事而皇太后親霍后之姊子故常竦體敬而禮之皇后輿駕侍從甚盛賞賜官屬以千萬計與許后時懸絕矣後殺許后事泄后廢處昭臺宮

孝宣王皇后

漢書曰孝宣王皇后父奉光少時好鬪雞宣帝在民間數與奉光會相識奉光有女年十餘歲每欲適人所當適者輒死故久不行及宣帝即位召入後宮稱為婕妤霍皇后廢後上憐太子蚤失母幾為霍氏所害於是乃選後宮素謹慎而無子者遂立王婕妤為皇后令母養太子元帝即位為皇太后成帝即位為太皇太后時成帝母亦姓王氏故號太皇太后為邛成太后年七十餘

崩

以后父奉光封邛成侯故號之

孝元王皇后

漢書曰孝元王皇后王莽之姑也王賀字翁孺為武帝
繡衣御史逮捕魏郡盜皆縱不誅以奉使不稱免歎曰
吾聞活千人者有封子孫吾所活者萬餘人後世其興乎翁
孺既免而與東平陵終氏為怨乃徙魏郡元城委粟里
為三老魏郡人德之元城建公曰元城縣建公姓名也昔春秋沙
麓崩晉史卜之曰陰為陽雄土火相乘此龜繇文陰元后也陽漢也王
氏舜後土也漢火也故曰故有沙麓崩後六百四十五
土火相乘陰盛而沙麓崩

年宜有聖女興其齊田乎今王翁孺徒正直其地日月當之元城郭東有五鹿之虛即沙麓地也後八十年當有貴女興天下云翁孺生禁字稚君禁生女政君即元后也初母李親妊政君在身夢月入其懷及壯婉順得婦人道常許嫁未行所許者死後東平王聘政君為姬未入王薨禁獨怪之使卜數者相政君當大貴不可言禁心以為然乃教書學鼓琴五鳳中獻政君年十八矣入掖庭為家人子皇后擇後宮可以娛侍太子者政君與

在其中及太子朝皇后乃見政君等五人徵令旁長御
問知太子所欲太子殊無意於五人者不得已於皇后
強應曰此中一人可是時政君坐近太子又獨衣絳緣
諸于長御即以為皇后使送政君於太子宫見丙殿
得御幸有娠甘露三年生成帝於甲館畫堂為世適皇
孫宣帝崩太子即位是為孝元皇帝立太孫為太子以
母王妃為皇后哀帝即位為太皇太后哀帝崩無子以
莽為大司馬共徵立中山王奉哀帝後是為平帝平帝

年九歲常被疾太皇太后臨朝平帝崩無子莽立孺子
踐祚居攝太后不以為可力不能禁於是莽遂為攝皇
帝其後莽遂以符命自立為真皇帝漢傳國璽以孺子
未立璽藏長樂宮及莽即位請璽太后不肯以授莽莽
使安陽侯舜諭旨舜素謹飭太后雅愛信之舜既見太
后知其為莽求璽怒罵之曰汝屬父子宗族蒙漢家力
富貴累世既無以報受人寄託乘便利時奪取其國不
復顧恩義為人如此者猪狗不食其餘天下豈有而兄

弟耶且若自以金匱符命為新皇帝變更正朔服制亦當自更作璽傳之萬世何用此亡國不祥璽而欲求之我漢家老寡婦旦暮且死欲與此璽俱葬終不可得太后因涕泣恐莽欲脅之乃出璽投之地莽改號太后為新室文母絕之於漢太后年八十四建國五年二月癸丑崩三月乙酉合葬渭陵

孝元傅皇后

漢書曰孝元傅昭儀哀帝祖母也父河內温人昭儀少

為上官太后才人自元帝為太子得進幸元帝即位立為婕妤甚有寵為人有才略善事人下至宮人左右飲酒酌地皆祝延之產定陶恭王薨子代為王成帝無子立定陶王為太子成帝崩哀帝即位尊為太后

信都馮太后

漢書曰孝元馮昭儀平帝祖母也元帝即位二年以選入後宮後五年就館生男拜為婕妤父奉世為右將軍光祿勳奉世長男野王為左馮翊議者以為器能當具

位而婕妤內寵與傅昭儀等建始中上幸虎園鬪獸後
宮皆坐熊佚出園攀檻欲上殿左右貴人傅昭儀等皆
驚走馮婕妤直前當熊而立左右格殺熊上問人情驚
懼何故前當熊婕妤對曰妾聞猛獸得人而止妾恐熊
至御坐故以身當之元帝嗟嘆以此倍敬重焉

孝成許皇后

漢書曰孝成許皇后平恩侯嘉女也元帝悼傷母恭哀
后居位日淺而遭霍氏之辜故選嘉女以配皇太子侍

送者還白太子懽悅狀元帝喜謂左右酌酒賀我左右
皆稱萬歲久之及成帝即位立許妃為皇后后聰慧善
史書自為妃至帝即位常寵於上後宮稀得進見久之
皇后寵亦益衰而後宮多新愛姊平安剛侯夫人謁等
為媚道祝詛後宮有娠者太后大怒下吏考問謁等誅
死許后坐廢處昭臺宮

孝成趙皇后

漢書曰孝成趙皇后本長安宮人初屬陽阿主家學歌

舞號曰飛燕成帝嘗微行出過陽阿主作樂上見飛燕而說之名入宮大幸有女弟復名入俱為婕妤貴傾後宮封婕妤父臨為咸陽侯後月餘乃立婕妤為皇后後寵少衰而弟絕幸為昭儀居昭陽舍其中庭彤朱而殿上髹漆切皆銅沓冒黃金塗白玉階壁帶往往為黃金釭謂壁中之橫帶藍田璧明珠翠羽飾之自後宮未嘗有焉

孝哀丁太后

漢書曰定陶丁姬哀帝母也河平四年生哀帝丁姬為

太后建平三年丁太后崩起陵恭皇之園王莽秉政乃
奏貶傅太后號曰定陶恭王母丁太后號曰丁姬元始
五年莽復言恭王母丁姬葬渭陵冢高與元帝山齊
禮有改葬請發王母及丁姬冢徙歸定陶太后以為既
已之事不須發葬固爭之太后詔曰因故棺為致槨作
冢祠以太牢既發傅太后冢崩壓殺數百人開丁姬槨
戶火出焚四五丈吏卒以水沃滅乃得入燒燔槨中器
物莽復奏言前恭王母生僭居桂宮皇天震怒災其正

殿丁姬死葬踰制度今火焚其槨此天見變以告當改
如媵妾也恭王母及丁姬棺皆名梓宮珠玉之衣非藩
妾服請更以木棺代去珠玉衣葬丁姬媵妾之次奏可
既開傅太后棺臭聞數里掘平恭王母丁姬故冢二旬
間皆平莽又周棘其處以為世戒云時有羣燕數千啣

土投丁姬穿中

師古曰穿謂壙中也

孝哀傅皇后

漢書曰孝哀傅皇后定陶傅太后從弟子也哀帝為定

陶王時傅太后欲重親取以配王王入為漢太子傅氏女為妃哀帝即位立為皇后哀帝崩王莽白太后令孝哀皇后退就桂宮後月餘復與孝成趙皇后俱廢為庶人就其園自殺

孝平母衛姬

漢書曰中山衛姬平帝母也父子豪中山盧奴人官至衛尉子豪女弟為宣帝婕妤生楚孝王長女又為元帝婕妤生平陽公主成帝時中山孝王無子上以衛氏吉

祥以子豪少女配孝王生平帝平帝年二歲孝王薨代
為王哀帝崩無嗣太皇太后與新都侯莽迎中山王立
為帝莽欲謁國權衛姬及外家不當得至京師乃賜衛
姬璽綬即拜為中山王后莽長子宇非莽隔絕衛氏恐
久後受禍於是私教衛后上書謝恩幾得至京師莽白
太后詔嘉之衛后日夜啼泣思見帝而但益戶邑宇復
教令上書求至京師會事發覺莽殺宇盡誅衛氏支屬
唯衛后在莽篡國廢為家人後歲餘卒葬孝王旁

孝平王皇后

漢書曰孝平王皇后莽女也莽欲依霍光故事以女配
帝帝崩莽立孝宣帝玄孫嬰為孺子莽攝帝位尊皇后
為皇太后三年莽即位為真皇帝以嬰為安定公改皇
太后號為安定太后太后時年十八為人婉嫕有節操
自劉氏廢常稱疾不朝會莽敬憚傷哀欲嫁之更號黃
皇室主令立國將軍成新公孫建世子豫飾將醫往問
疾后大怒笞鞭其旁侍御因發病不肯起莽遂不復強

也及漢兵誅莽焚燒未央宮后曰有何面目以見漢家
自投火中而死

太平御覽卷一百三十六

欽定四庫全書

太平御覽卷一百三十七

宋 李昉等 撰

皇親部三

東漢光武郭皇后

光武陰皇后

孝明馬皇后

孝章母賈貴人

孝章竇皇后

孝章梁皇后

敬隱宋皇后

孝和陰皇后

孝和鄧皇后

曹大家附

孝德左皇后

孝安閻皇后

孝安李皇后

孝順梁皇后

孝冲母虞貴人

孝質母陳妃

孝崇區皇后

孝桓梁皇后

孝桓鄧皇后

孝桓竇皇后

孝仁董皇后

孝靈宋皇后

孝靈何皇后

孝靈王皇后

孝獻伏皇后

孝獻曹皇后

光武郭皇后

續漢書曰光武郭皇后真定橐人也安陽思侯昌女曰
聖通世祖至真定納聖通有寵世祖即位聖通為貴人
建武元年生皇子彊二年貴人立為皇后彊為太子是
後后寵衰數懷怨懟廢十七年廢為中山王太后二十
八年薨於北邙

光武陰皇后

續漢書曰光武光烈陰皇后南陽新野人名麗華宣恩
哀侯陸女也陸卒後女年十九歲兄識嫁與世祖納后
於宛當成里以后性寬仁宜母天下欲授以尊位后輒
退讓以郭氏有子終不肯當遂立郭皇后建武四年生
顯宗於元氏十七年郭皇后廢立為皇后十九年太子
彊廢立顯宗為太子

東觀漢記曰上微時過新野聞后美心悅之後至長安
見執金吾車騎甚盛因歎曰仕宦當作執金吾娶妻當

得陰麗華更始元年遂納后於宛

孝明馬皇后

續漢書曰孝明明德馬皇后伏波將軍新息侯援之女
后年七歲幹治家事勅制僮御出入投計一以貫之諸
家莫如其母不知其家事獨后所為也後聞之咸驚異
焉母嘗使善卜者相后曰此女必當大貴遂為帝王妃
然而少子建武二十八年年十三以選入太子宮接待
同列侍承至尊先人後已發以至誠由是見寵永平三

年春有司奏請立長秋宮以帥八妾上未有所言皇太后曰馬貴人德冠後宮即其人也遂立為皇后身衣大帛御者无裙不緣性不喜出入遊觀未嘗臨御牕牖又不好音樂上時幸苑囿離宮以故希從輒誠言不宜晨起因陳風邪霧露之誠辭意甚備上納焉誦易經習詩論春秋畧記大義讀楚辭尤善賦頌疾其浮華聽論輒摘其要讀光武皇帝紀至有獻千里馬寶劍者上以馬駕鼓車劍賜騎士手不持珠玉后未嘗不嘆息也時有

楚獄連年不斷囚證相引坐繫者甚多后慮其多濫承
間為上言之上惻然感動於是夜起彷徨思論所納非
臣下所得聞后志在克己奉上不以私家干朝廷兄為
虎賁中郎將兩弟黃門郎訖永平世不遷明帝體不安
召黃門防奉參醫藥夙夜勤勞帝崩后作起居注削去
防參醫藥事章帝即位后為皇太后下詔告三輔二千
石無得令馬氏婚親因權屬託奸亂吏治犯者正法以
聞太后素自喜儉前過濯龍門上見外家問起居車如

流水馬如龍蒼頭衣綠襦直領領袖正白顧視旁御者
遠不及也亦不譴怒但絕其歲用冀以嘿愧其心耳於
是親戚被服如一政教不嚴而從以躬率先之故也置
織室蠶於濯龍中數來往觀視內以娛樂外以先女功
太后崩合葬顯節陵

東觀漢記曰后長七尺二寸青白色方口美髮為四起
大髻但以髮成尚有餘繞髻三匝復出諸髮眉不施黛
獨左眉角小缺補之如粟后素謹慎小感慨輒自責如

平生事舅姑時新平主家御者失火及北閣後殿深以自過起居不歡至正月當上原陵言我守備不慎慙見原陵遂不上

陳思王畫讚序曰昔明德馬后美於色厚於德帝用嘉之嘗從觀畫虞舜見娥皇女英帝指戲之曰恨不如此為妃又前見陶唐之象后指堯曰嗟夫羣臣百僚恨不戴君如是帝顧而笑

孝章母賈貴人

續漢書曰孝明賈貴人南陽人明德皇后之姨女孝章
皇帝之母也初選入後宮為貴人生章帝馬后無子帝
既生而馬后母養之明帝謂馬后曰人未必當自生子
也但患養之不勤愛之不至耳若能愛如己子則孝敬
亦如親生矣於是馬后待章帝過於所生章帝感后養
育之恩遂專名馬氏為外家故賈貴人不蒙舅氏之寵

孝章竇皇后

續漢書曰孝章章德竇皇后右扶風平陵人竇勳之女

后生二歲呼卜相工見后皆言大貴有容貌才能母泚陽公主欲內之帝聞后有才色數以問諸姬建初二年后與女弟隨主入見長樂宮進止得適人事修備奉事長樂宮下至侍御貢獻問遺皆得其歡心太后異之亦可焉入掖庭見北宮章德殿后性敏給稱譽日聞太后亦緣意明年有司請立長秋宮遂立為后有寵專固後宮先是宋貴人生太子慶梁貴人生和帝后心忌害之皆誣以挾邪媚道貴人姊妹以憂卒

孝章梁皇后

續漢書曰孝章恭懷梁皇后安定烏氏女也父竦建初
中以女二人選入宮有寵其弟產孝和皇帝竦后母養
欲隔絕梁氏初和帝生竦兄弟不勝忻喜竊私相賀語
言漏泄傳聞竦后惡之遂作飛語誣陷以惡詔書傳考
竦死漢陽獄家屬徙九真二貴人以憂薨永元九年竦
太后崩竦長女嫫上書自陳上遂見嫫泣涕問訊賞賜
舍第財物以二貴人斂葬禮闕改殯之於承光宮上貴

人尊號曰皇太后與姊貴人合葬於西陵上謚曰恭懷
皇后儀比敬園追爵謚竦為褒親愍侯徵還竦家屬

敬隱宋皇后

續漢書曰敬隱宋皇后右扶風平陵人當陽穆侯楊之
女也兩女皆有才能令色永平末俱選入宮配皇太子
皆寵明帝崩太子即位是為章帝姊妹並為貴人建初
三年小貴人生皇子慶二歲立為皇太子後竇后幸廢
為清河王至永元九年竇后崩清河王上書求上貴人

冢又為外祖母求詣洛陽治病詔曰聽之殤帝崩清河
王子立是為安帝鄧太后崩安帝追尊小貴人曰敬隱
皇后

孝和陰皇后

續漢書曰孝和陰皇后吳房侯綱之女也后為人聰慧
有才能永元四年選入掖庭為貴人以先后近屬故有
異寵立為皇后自和熹鄧后入宮後陰后寵衰怨恨后
外母鄧朱數出入宮掖後有言后與朱共挾蠱道賜后

策遷於桐宮以憂死葬臨平亭部

孝和鄧皇后

續漢書曰孝和和熹鄧皇后太傅高密侯禹之孫平壽
敬侯訓之女也訓有五男三女長隲次惊悝弘閭女燕
次綏綏卽后也次容蚤卒有子女娥甫在襁褓時后年
十二傷娥早孤親養撫育慈恩深至后七歲讀論語十
二通詩諸兄請經輒下意難問微意志在書不問家事
傅母非之曰當習女工以供衣服今不是務寧當舉博

士邪后重違母意則縫紵極女工事暮夜私買脂燭讀經傳宗族內外皆號曰諸生父訓心異之永元四年呼相工蘇文相后大驚曰此成湯之骨法也貴不可言七年中復與諸家女俱選入宮姿容窈窕進退辭令粲然有異於衆女八年十一月己卯后入掖庭為貴人諸兄除郎中后時年十六德冠後宮后性恭肅小心承事陰氏夙夜兢兢接撫同列常克己下之上深喜焉遂有特寵后自入宮遂博覽五經傳記圖讖內事風雨占候老

子孟子禮記月令法言不觀浮華申韓之書上每欲官
秩后諸兄弟輒為推讓孝和世臨裁虎賁中郎將京悝
弘閭黃門郎和帝未崩數失皇子皇子生養於民間羣
僚無知者及和帝崩是日倉卒上下憂惶后乃收斂皇
子皇子勝長有微疾瑒帝生百餘日后欲自養長立為
皇子其夜即位尊皇后為太后帝在襁褓皇太后臨朝
建元元年三月太后崩丙午合葬順陵

東觀漢記曰后年五歲太夫人為剪髮夫人年老目冥

剪中后額雖痛忍不言一額盡傷左右怪而問之后言
夫人哀我為斷髮難傷老人意故忍之耳及為太后時
宮中亡大珠一篋太后念欲下掖庭問之恐有無辜僵
仆者乃親自臨見宮人閱問動察顏色開示恩信宮人
即時首服不加鞭笞不敢隱情宮人驚懼咸稱神明

曹大家附

後漢書曰扶風曹世叔妻者同郡班彪之女也名昭字
惠班一名姬博學高才世叔早卒有節行法度兄固著

漢書其八表及天文志未及竟而卒和帝詔就東觀藏書閣踵而成之帝數召入宮令皇后諸貴人師事焉號曰大家每有貢獻異物輒召大家作賦頌及鄧太后臨朝預聞政事作女誡七篇年七十餘卒皇太后素服舉哀使者監護喪事所著賦頌銘誄論疏凡十六篇子婦丁氏為撰集之又作大家讚焉

孝德左皇后

續漢書曰孝德左皇后安帝母也父仲躬捷為武陽人

后兄聖伯為妖言伏誅父母家產皆沒官后長掖庭有
令色賜清河王王大悅特親幸自姬妾已下莫能與比
六年生男為清河太子卒葬當利庭延平元年殤帝崩
清河太子為皇帝尊清河孝王曰孝德皇帝左姬曰孝
德皇后

孝安閻皇后

續漢書曰孝安思閻皇后河南滎陽人侍中長水校
尉暢之女也有才能令色立為皇后安帝崩閻后皇太

后與兄顯定策禁中迎濟北惠王少子北卿侯懿立為
皇帝奉後以其年少欲久專政於是太后攝政永建元
年崩謚安思后合葬恭陵

孝安李皇后

續漢書曰孝安恭愍李皇后以宮人侍上見幸生順帝
為閔后所妬見鳩物故瘞葬城北帝即位左右以聞更
以禮殯永元二年葬北陵謚曰愍皇后

孝順梁皇后

續漢書曰梁皇后大將軍商女后有光景之祥及長聰
敏仰承兄姊俯接弟妹恩情周悉既有女工之巧尤好
史書學問之事九歲能誦孝經論語遂治韓詩大義略
舉常以列女傳圖置在左右宗族中外咸敬服焉永建
三年與娣俱選入掖庭相工茅通見之大驚曰此所謂
日角偃月相之極貴臣所未嘗見於是以為貴人恩寵
日崇乃白上曰陽以博施為德陰以不專為義蓋詩人
多蝕斯之福則百斯男之作所由興也願陛下思天行之

均澤識貫魚之次序使小妾得免非謗之累於是上愈善之益親顧焉陽嘉元年立為皇后冲帝在襁褓太后攝政和平元年崩羣臣奏謚曰順烈皇后合葬獻陵

孝冲母虞貴人

續漢書曰孝順虞大家孝冲皇帝母也遭冲質俱天政在梁氏故與質帝母俱抑而無號嘉平四年小黄門趙祐議郎畢正上言春秋之義母以子貴孝冲皇帝母虞大家質皇帝母渤海陳夫人皆誕生聖帝未有稱號今

遭盛明當以母氏序戴外戚朝廷之恩臣子雖賤尚有
追贈况二母見存而徒曰大家夫人非所示後進母以
子貴之義上感其言即日拜大家為貴人使中常侍持
節就園授印綬

孝質母陳妃

續漢書曰樂安陳夫人孝質皇帝母也家本魏郡少以
伎入孝王宮得幸生質帝梁冀欲專國權令帝母不得
至京都又帝短祚是以外家無他寵靈帝拜夫人為孝

王妃

孝宗憲皇后

續漢書曰螽吾博園憲貴人者桓皇帝母也上年十四
龍父螽吾侯翼爵即帝位追尊帝父為崇皇陵曰博陵
憲夫人為博園貴人和平元年有司上言為孝宗皇后
即授印綬宮曰永樂

孝桓梁皇后

續漢書曰孝桓懿獻皇后順烈后之女弟也字女瑩上

始即位備禮儀納米案舊令聘后納采鴈璧乘馬束帛如孝惠孝平故事聘后黃金二萬斤建和四年立為皇后時太后秉政皇后擅寵後宮太后崩後后恩稍衰後宮妊孕若產皇子后輒隨嫉害少有得全育者然終身亦無子後見御轉希至延熹二年以憂患崩葬懿陵

孝桓鄧皇后

續漢書曰孝桓鄧皇后字猛女母宣本微賤初適郎中鄧香生后後適梁紀故后冒姓梁氏永興中入掖庭為

采女上誅后兄冀等立為皇后帝惡梁姓之同改姓薄氏復姓鄧氏后恃尊驕忌與上所幸郭貴人更相譖乃廢之凡立七年以憂死葬於北邙

孝桓竇皇后

續漢書曰孝桓竇皇后章德皇后之族孫大將軍武之女也延熹八年鄧后廢立為皇后孝靈帝立尊皇后為皇太后臨朝武以官者放縱日久謀悉誅其衆上欲獲忠節下以副輿論數入禁中進白太后太后以為此皆

天所生漢興以來世世用事國故典常何可廢耶但當
誅首惡耳中常侍管霸頗聞其語結謀誅武武自殺太
后歸長樂宮嘉平元年六月崩合葬宣陵

孝仁董皇后

續漢書曰河間慎園董貴人孝靈皇帝母也靈帝即皇
帝位追尊父長為孝仁皇帝陵曰慎陵董太夫人曰慎
園貴人及竇太后歸政還長樂宮迎貴人到京都奉壘
綬上尊號為孝仁皇后稱永樂宮竇太后崩後永樂后

數至前省與上相見與於政事中平六年上棄天下永樂后兄子重為驃騎將軍何太后臨朝重與太后兄大將軍進權勢相害后每欲參與政事太后輒相禁塞后憤恚嗔罵曰汝軼張怙汝兄耶勅驃騎斬大將軍頭來何太后以告進進收重免官爵重自殺后憂怖病還河間崩合葬慎陵

孝靈宋皇后

續漢書曰孝靈宋皇后敬隱宋貴人之從孫執金吾鄴

之女無寵而久當正位後宮幸姬衆共譖惡誣以祝詛
上信之遂策收璽綬后自致暴室獄以憂死父及兄弟
皆被誅諸常侍小黃門在省闈者皆憐宋氏無辜共合
錢物收葬后及鄴父子於臯門亭宋氏舊塋

孝靈何皇后

續漢書曰孝靈靈思何皇后南陽宛人也以良家子選
入掖庭見幸妊身就館生男為貴人父貞前卒召貴人
同父兄何進為郎中靈帝崩何皇后子辯即位尊皇后

為皇太后進為錄尚書袁紹謀誅廢中官進以紹計白
太后后不聽以為中官統禁省自古及今漢家故事不
可廢也且先帝新棄天下奈何令我與士人共事乎及
董卓屯顯陽議以為太后迫永樂后令崩逆婦姑之節
遷太后於桐宮太后暴崩羣臣奏謚曰靈思皇后合葬
文昭陵

孝靈王皇后

續漢書曰孝靈靈懷王皇后孝獻帝母王章女也才明

聰敏能書會計以良家子應法相選入掖庭光和三年中愛幸妊身后畏何皇后服藥欲除妊胎安不動又后數夢負日而行遂不敢播四年三月癸巳生上庚子渴飲米粥遂暴薨上歸掖庭暴室嗇夫朱直擁養獨擇乳母歲餘永樂后自將護至三歲靈帝憫上早失所生追思后令色乃作追德賦令儀頌陵曰文昭陵起墳立陵園北

孝獻伏皇后

續漢書曰孝獻伏皇后瑯琊東武人侍中輔國將軍不
其侯完女也后坐與父完謀為書詐罔不道上收后下
暴室詔獄憂死兄弟皆伏誅

張璠漢記曰曹操入其二女於宮為貴人誣伏氏為亂
使御史大夫郝慮仗節收后后被髮跣足走而執上手
曰不能復相活耶上大號驚哭曰我亦不知命在何時
顧謂慮曰郝公天下暴虐豈有此乎左右莫不流涕遂
殺后也

曹瞞列傳曰公遣華歆勒兵入宮收后后閉戶藏壁中
歆攘戶廢壁牽后出

孝獻曹皇后

續漢書曰孝獻曹皇后丞相魏王操女也名憲建安十
八年上納操二女憲節於後宮皆以為貴人明年伏后
薨憲為皇后二十年獻帝禪位於魏憲拜山陽公夫人

太平御覽卷一百三十七